

Gras unn aach Kräuter

Doo habb ich doch gessdern de Schorsch getroffen, wie er in de Emge-Gass stieht – die Gass zwische Haupt- unn Grawestrooß grad geescheiwwer de Gallus-Kersch hott werklisch koon Nome unn deshalb nennt merr se Emge– odder aach Weilegass –, also doo stieht de Schorsch unn betracht sich die Plonnse, die dort uffem Boddem die Häuserwänd entlang wachse.

Waaßde was dess gewwe soll? hott er mich gefroochd. Naa, habb ich gesaad, awwer ich denk merr, jetz, wo se all von de Hildegard von Binge schwätze, gibt dess villeischd enn Kräutergadde. Doo wächst dann Blutwurz, Zinnkraut, Liebstöckel, Beifuss, Salbei, Melisse unn ... awwer was moonsden du?

Ei, sacht de Schorsch, ich hab mehr on e Testgelände gedenkt. Waaßde, wenn su e Stadt wie Flerschem verlosse werdd, wie longs doo dauern deet, bis sich die Natur widder Strooße unn Heiser erobert hott; wie alles dorsch Pionierplonnse, Gras unn Buschwerk widder zu Erd unn Wald geworn iss. Dess könnt enn Natur-Lehrpaad wern. Merr misst nor Schilder uffhänge, dass merr wisse deet, was dess alles ferr Zeich iss, was doo wächst. Dess werr intressont, nit nor ferr die Schulkinner.

Mir stehn doo unn dischpediern, doo kimmt em Schorsch soi Fraa, dess Kättche, die Gass erunner unn sacht: No ihr zwaa, moont ihr nit aach, dass dess Uukraut emol ausgerobbd wern soll? - dess mecht doch die gonze Schdoo kaputt! Schorsch, hosde dess Geborstdaachskärtche kaaft?

Doo schiddeld de Schorsch mettem Kobb: Naa, dess wollt ich jetz gleich holle.

Alles muss merr selber mache, seets Kättche, unn marschirt die Gass enunner

De Schorsch guckt mich oo unn ich de Schorsch unn doo moont de Schorsch: Mett unserne Fraue konnsde iwwer su Theorien nitt redde, e Fraa hott koon Sinn ferr so weitläufische Gedonke wie mir Männer se hawwe..

Uff oomol guckt dess Kättche unne um die Eck unn ruft: Schorsch, du host enn Knolle kriecht, warum hosden aach nitt die Parkscheib vorne ins Auto geleeschd?

O je, seet doo de Schorsch, jetz muss ich fort. Unn ferr de Knolle krieg ich jetz zwaa Mol moi Sunndaachsgeld gekerrzd. Awwer die Emge-Gass, die beobachte mir zwaa weiter, gell?

Eiern Honnes